



# Informativni bilten Općine Vareš

**Pobjednici malonogometnog turnira Sarajevo 1.12.2009.**



**Prvi snijeg u  
Varešu**



**Kapitalna  
ulaganja**



**Novo vozilo  
Doma zdravlja**





## PROGRAM KAPITALNIH ULAGANJA ZA 2009 GODINU NA PODRUČJU OPĆINE VAREŠ

Iz programa kapitalnih ulaganja u cestovnu infrastrukturu na području Općine Vareš za 2009 godinu započeti su radovi na asfaltiranju putnih pravaca i to:

Striježevo-Kokošćići širine asfaltnog kolovoza 4m u dužini od 210 metara.

Vrijednost radova za ovaj putni pravac iznosi oko 50.000,00 KM.

Dabravine- Luke-Kadarići širine asfaltnog kolovoza 4m u dužini 160 metara.

Vrijednost radova za ovaj putni pravac iznosi oko 30.000,00KM

Radove na pomenuta dva pravca izvodi Mušibegović d.o.o Visoko.

Iz ovog programa planirano je asfaltiranje puta Ravne-Crna rijeka širine asfaltnog kolovoza 5m u dužini 375 metara u vrijednosti oko 50.000,00 KM

Radove na pomenutom pravcu će izvoditi HS-PUTEVI d.o.o Tešanj, te put Sastavci-Gornja Borovica širine asfaltnog kolovoza 3m u dužini od 315 metara u vrijednosti oko 50.000,00 KM te put Sastavci-Dornja Borovica u vrijednosti oko 30.000,00 KM.

Radove na pomenutom pravcu će izvoditi Trgošped d.o.o Kakanj.

## LOKALNI EKOLOŠKI AKCIONI PLAN LEAP

U okviru projekta "Lokalni ekološki akcioni plan (LEAP) za održivost u jugoistočnoj Evropi" koji je finansiran od Švedske međunarodne organizacije za razvoj i saradnju (SIDA) a koji provodi Regionalni centar za okoliš za Bosnu i Hercegovinu (REC) Općina Vareš je uradila "zadaću" .

Donesena je Odluka o izradi LEAP-a, formirana radna tijela, za nosioce određeni NVO "Ekoturist" Vareš i REC i dokument usvojen od strane Općinskog vijeća 02.07.2009.

Sačinjen je i prijedlog prioriternih projekata:

- 1.Izgradnja kanalizacione mreže po seoskim MZ
- 2.Saniranje divljih odlagališta otpada
- 3.Nastavak aktivnosti na selektivnom prikupljanju otpada
- 4.Postavljanje niša za kontejnere
- 5.Nastavak postavljanja kontejnera radi uspostavljanja organizovanog odvoza smeća na području cijele općine
- 6.Uređenje autobuskih stajališta na gradskom području
- 7.Proглаšenje dijela planine Zvijezda zaštićenim pejzažom
- 8.Uređenje fasada koje su u ruševnom stanju.

Sljedeći korak je određivanje prioritne projektne aktivnosti i usvajanje akcionog plana za provedbu odabranog projekta.

Ukupna vrijednost projekta je 150.000,00 KM, SIDA učestvuje u projektu sa 100.000,00 KM a općina Vareš sa 50.000,00 KM.



**Radovi na putu Striježevo - Kokošćići**



## POZORIŠTE U OPĆINI

Već drugi put u ovoj godini imali smo priliku ugostiti članove Dramskog studija Centra za kulturu Kakanj, koji su 19.11.2009. u velikoj sali općine Vareš izveli predstavu "Mješoviti brak u doba recesije". Tekst i scenario su djelo dva mlada glumca koji su i protagonisti predstave. Mirnes Kubat i Emerin Ahmetašević su priuštili gledaocima ugodno veče a posjeta je pokazala "potrebu" građana i jednostavno varešku tradiciju i odnos prema kulturi koju i sveprisutna recesija nije ugasila.

## ZIMSKO ODRŽAVANJE REGIONALNIH CESTA I LOKALNIH PUTEVA NA PODRUČJU OPĆINE VAREŠ

U cilju obezbjeđenja adekvatne prohodnosti i održavanja regionalnih cesta u zimskom periodu Ministarstvo za prostorno uređenje, promet i komunikacije i zaštitu okoline ZDK je potpisalo ugovore sa odabranim izvođačima radova na zimskom održavanju u periodu 15.11.2009. – 15.03.2010., za sljedeće dionice regionalnih cesta:

R444 Breza - Pajtov Han – Vareš – Šimin potok, izvođač "Nahonal-gas" Breza, kontakt osoba Nahić Čamil 061 176 464

R444 Šimin potok – Vijaka – Podkamenko, izvođač "Porobić" Zavidovići kontakt osoba Porobić Eldin 061 781 560

R444a Vareš – Pogar – Ratanj, izvođač JKP Vareš, kontakt osoba Džafo Dževad 061 186 363

Zimsko održavanje lokalnih puteva, što je obaveza finansiranja od strane Općine Vareš, nije regulisano ugovorom sa odabranim izvođačem putem javnog poziva. Lokalne putne pravce održava JKP Vareš a Općina obaveze prema izvođaču izvršava na

osnovu izvršenih radova (rad mašina, gorivo, održavanje mehanizacije i posipni materijal)

## RURALNI RAZVOJ

U projektu jačanja lokalne uprave u Bosni i Hercegovini kroz učešće civilnog društva u procesima upravljanja i odlučivanja s ciljem aktiviranja lokalnog gospodarstva, realizuje se pilot projekat čiji potpisnici su općine Breza, Vareš, Vogošća, APRODEL (Agencija profesionalaca lokalnog razvoja Madrid Španija) i SERDA (Sarajevska regionalna razvojna agencija) Sarajevo. Objavljen je Javni poziv, a predmet poziva je dodjela bespovratnih novčanih sredstava za sufinansiranje projekata iz oblasti: ruralni turizam, valorizacija i komercijalizacija poljoprivrednih proizvoda, mala i srednja preduzeća, valorizacija kulturne baštine.

Pravo učešća imaju: općine, neprofitna udruženja, mala i srednja preduzeća, samostalni poduzetnici, potencijalni poduzetnici, poljoprivrednici iz registra poljoprivrednih gazdinstava.

Projekat se istovremeno realizuje na teritoriji tri navedene općine koje predstavljaju regiju, a sve aktivnosti vodi Lokalna akciona grupa (LAG) "Zvijezda". Projekat se provodi putem "LEADER" metodologije koja je uspješno primjenjivana u Španiji, Irskoj, Italiji i Portugalu u korištenju Fonda Evropske unije za ruralni razvoj. Ukupna sredstva u projektu su 107.800,00 eura i predviđeno je učešće svake općine u iznosu od 10.000,00 KM.

## GRIJANJE U VRTIĆU

Kroz projekat rekonstrukcije dijela zgrade i obnove centralnog grijanja koji je realizovan zahvaljujući inicijativi udruženja građana "Humanost-societas humanitatis" iz Zenice koji su svoj rad i senzibilitet usmjerili na unapređenju i zaštiti djece a naročito socijalnim pitanjima kao i obrazovan-

ju obezbjeđena su sredstva donatora "Brot und Bücher e.V" iz Njemačke a projekat su sufinansirali i udruženje Humanost- Zenica i Općina Vareš. Izvođač radova bio je JKP Vareš. Za sve koji su bili uključeni u projekat bilo je upriličeno druženje a djeca iz vrtića su izvela priredbu u sada savim uslovnom i toplom prostoru.

Zato, dragi roditelji pozivamo Vas da dođete u ovu ustanovu i lično se uvjerite da će Vaše dijete biti u uslovnom i lijepom ambijentu i ono što je najbitnije okruženo pažnjom, brigom i profesionalnim odnosom zaposlenika.

## DJELIMIČNA REKONSTRUKCIJA DOMA NA STRIJEŽEVU

Na objektu Društvenog doma na Striježevu izvršena je izmjena kompletne stolarije i okrečeni prostori male i velike sale.

Djelimičnu rekonstrukciju Doma je organizovao Savjet MZ Striježevu sa namjerom da se objekat zatvori i osigura od daljih oštećenja i koliko je moguće da se enterijer adaptira za održavanje sastanaka i javne skupove.

Stolarija i dio radova na Domu plaćen je sredstvima općinskog budžeta u visini od 2.700,00 KM.





## DOM ZDRAVLJA KONAČNO DOBIO VOZILO ZA DIJALIZU

Kroz učešće Ministarstva zdravlja i Zavoda zdravstvenog osiguranja ZDK kupljeno je i donirano vozilo Domu zdravlja Vareš. Ovo vozilo prioriteto će služiti za prijevoz 6 vareških pacijenata koji idu na dijalizu u Kantonalnu bolnicu Zenica. Vozilo je registrovano 1+8 što daje mogućnost, po potrebi, i odlazak drugih pacijenata u Kantonalnu bolnicu Zenica. Vrijednost vozila je 35.000,00 KM.



## ADAPTACIJA TERENSKE AMBULANTE U DRAGOVIĆIMA

U implementaciji programa unapređenja zdravstvene zaštite stanovništva, Federalno ministarstvo zdravlja finansira projekat rekonstrukcije terenske ambulante Dragovići. Ministarstvo je provelo proceduru odabira izvođača a u toku su radovi na uređenju enterijera. Izvođač je firma "Željo" D.O.O. iz Konjica, a vrijednost projekta je 26.000,00 KM.

## ULTRAZVUČNA DIJAGNOSTIKA U VAREŠU

U prvoj polovini decembra u Varešu počinje sa radom privatna praksa prim. dr. Fikreta Operte, u kojoj će se obavljati ultrazvučna dijagnostika: svih organa trbuha i zdjelice, ultraz-

vuk dojke, štitne žlijezde, krvnih žila vrata, krvnih žila sudova gornjih i donjih ekstremiteta i trudnoće.

Aparat je crno- bijeli kolor doppler 3D i 4D. Trenutno je, u užoj regiji, (Vareš, Breza, Visoko i Olovo), to najsavremeniji aparat za ultrazvučnu dijagnostiku. Konačno građani Vareša imaju mogućnost pružanja vrhunске i profesionalne usluge u oblasti ultrazvučne dijagnostike i neće više imati potrebu za odlaske u Visoko, Zenicu ili Sarajevo.

## ŠLJEME NA DŽAMIJI U KOKOŠĆICIMA

19. novembra ove godine u Kokošćicima je održana tradicionalna svečanost "šljemeni" na novom objektu džamije. Kokošćići nikada nisu imali džamiju a vjerski obredi i okupljanje džemata odvijali su se u mektebskoj kući. Izgradnja novog objekta počela je u junu 2009. a osnovni građevinski radovi završeni su do polovine novembra. Vrijednost dosadašnjih radova i utrošenog materijala je 66.520,00 KM. Učešće vlastite radne snage Kokošćana je 5.620,00 sati odnosno 18.820,00 KM. Slijede radovi izgradnje munare, ugradnje stolarije i instalacija, radovi na unutarnjoj i vanjskoj fasadi, izrada ograde i uređenje harema džamije. Završetak radova i zvanično otvaranje džamije predviđeno je za ljeto 2010. godine.

## MANIFESTACIJA „HAJDAR-DEDI U POHODE“

U povodu Dana državnosti BiH i Kurban bajrama, od 25.11. do 02.12.2009.g. članovi udruženja „Šejh Hajdar-dedo Karić“ iz Vareša upriličili su u vareškoj tekiji višednevnu kulturno-vjersku manifestaciju „Hajdar-dedi u pohode“

U srijedu 25.11.2009.g. postavljena je izložba ručnih radova pod

nazivom „Djevojačko ruho“. Svoje radove izložile su žene iz Vareša i vareških sela: Budoželje, Ligatići, Mižnovići, Ravne, Zubeta, Daštansko, Dabravine, Luke, kao i članice udruženja „Čuvari bosanske krune“ iz Mijakovića i Dragovića. Na sergiji su se mogle vidjeti tkane i vezene mahrame, čemberi, jagluci, čavrme, dijelovi tradicionalne bošnjačke muške i ženske nošnje, sofranski i abdesni peškiri, priglavci, ponjave i pirlitane struke, vezeni jastuci i čaršafi.

U petak 27. 11. 2009. g. održano je bajramsko sijelo uz bogat vjerski i kulturni program. Članovi udruženja predstavili su se učenjem ilahija i kaside, a sazlija Mujić Mujo uz muzičku pratnju na saz u izveo je nekoliko odabranih sevdalinki.

U nedjelju 29. 11. 2009. g. održano je bajramsko druženje žena kojim povodom je upriličeno postavljanje izložbe tradicionalnih bosanskih jela – „Bosanska sofru“. Jela su pripremile vrijedne hanume iz Vareša sa ciljem očuvanja i njegovanja kulture i tradicije Bošnjaka. Na sofru su postavljena stara bosanska jela: tarhana, dolme, maslanica, pogača, pite i druga slana jela. Od slatkih jela pripremljene su ružice, baklava i gurabije.

Svim ženama, učesnicama, dodjeljene su zahvalnice i prigodni pokloni. Svi dijelovi programa imali su za cilj da sačuvaju od zaborava dio bošnjačke tradicije i ujedno da se prigodno obilježe ova dva datuma bitna za Bosnu i Bošnjake.

Manifestacija „Hajdar-dedi u pohode“ održana je pod pokroviteljstvom i uz pomoć Vlade Zeničko-dobojskog kantona.





## NOGOMETNI KLUB “VAREŠ”

U nekoliko proteklih godina opredjeljenje i politika NK “Vareš” je rad sa mlađim kategorijama. Entuzijazam, predanost, stručan i kvalitetan rad na volonterskoj osnovi nekadašnjih igrača NK “Vareš”, dao je izvanredne rezultate.

U omladinskim ligama Zeničko-dobojskog kantona, nakon završetka jesenjeg dijela takmičarske 2009/2010. godine, kadeti i juniori NK “Vareš” zauzimaju prva mjesta u obje kategorije bez ijednog poraza.

Na tradicionalnom Bajramskom malonogometnom turniru održanom u Skenderiji 30.11. i 01.12.2009. godine u konkurenciji ekipa: Sarajeva, Bubamare, Piksi Pale, Vrbanjuša, Željezničar, Igman, Konjic i Radnik Hadžići, pioniri NK “Vareš” su bez poraza osvojili turnir pobijedivši ekipu NK Željezničar u finalu rezultatom 2:1.

Dječaci su pobrali sve simpatije a pehar pobjednika turnira podigao je Vedran Filipović golman mladih nada NK “Vareš”.

U sezoni 2010/2011. godina juniori će postati prvi tim. Uz kvalitetnu selekciju vlastitog igračkog kadra kroz tri kategorije i dobro organizovan klub, stvaraju se preduslovi da NK “Vareš” bude primjer kvalitetnog rada sa mlađim kategorijama i kluba koji svojim sportskim ponašanjem a naročito igrom osvaja simpatije ljubitelja “najvažnije sporedne stvari na svijetu”.





## MLADI KARATAŠI NIŽU USPJEHE

Karate klub "Vareš" osnovan je u novembru 2008.godine. Trenutno klub okuplja oko 40 dječaka i djevojčica raznih uzrasta. Trener kluba je gospođa Mirsada Operta koja sa djecom radi u 6 sedmičnih termina. Treninzi se održavaju u OŠ "Vareš Majdan" i u MSŠ "Nordbat 2" u Varešu. Treba napomenuti da su dva sedmična termina u OŠ "Vareš Majdan" prilagođena učenicima sa sela koji koriste javni prijevoz.

KK "Vareš" je u proteklom periodu veoma uspješno učestvovao na

većem broju takmičenja, a izdvajamo Regionalni turnir u Tuzli gdje su djeca iz Vareša u različitim kategorijama ekipno i pojedinačno osvojila 8 medalja od čega 4 zlatne, dalje na 8.Mđunarodnom karate turniru u Travniku, na kojem je učestvovalo 28 klubova sa preko 350 takmičara, naši mališani su osvojili ukupno 17 medalja od čega ovaj put 6 zlatnih, i na kraju 05.12.2009. godine na I Memorijalnom karate turniru u Brezi djeca osvajaju ukupno 33 medalje od čega ponovo 6 zlatnih.

Zahvaljujući entuzijazmu trenera, klub svakim danom okuplja sve više djece i postiže zavidne rezultate.



**Karataši na takmičenju**

## IZ TURIST INFO-A

Dana 31.10.2009 posredstvom turističke agencije Arte travel iz Sarajeva i info turist centra Vareš organizovan je jednodnevni izlet gostiju iz Sarajeva.

Među gostima su bili visoki dužnosici Američke ambasade, osoba za odnose sa javnošću Ruske ambasade, predstavnici turističke agencije Unis turs, Francuski general, predstavnik Raiffeisen banke iz Sarajeva. Sveukupno 28 osoba.

Goste smo dočekali u Podlugovima,

a ovu grupu vodili su certificirani turistički vodiči iz Vareša: Admir Čizmo, Branka Jozić, Dalibor Jozić. Turistička agencija je zbog veličine i zahtjevnosti ture zahtijevala tri turistička vodiča. Sa gostima smo se zaputili do Kraljeve Sutjeske.

U kraljevoj Sutjesci smo obišli Staru džamiju koju je dao izgraditi Sultan Mehmed El Fatih, Sutješki Samostan, muzej, staru kuću Ive Duspera, te smo prisustvovali tradicionalnom pečenju rakije kod vlasnika turističke agencije Katarina gospodina Josipa Brđanovića i njegove obitelji.

Nakon obilaska Kraljeve Sutjeske smo se zaputili kanjonom do Bobovca, unatoč upozorenjima da je tura jako zahtjevna i da je pogodna samo za osobe dobre psihofizičke kondicije, svi učesnici ove ture su htjeli da pješake kroz kanjon.

Nakon puna tri sata zadnja osoba je stupila na plato ispred kapele na Bobovcu, umorni, gladni i iscrpljeni. Ne baš sretni i veseli, tek smo nakon ture po njihovim pozitivnim kritikama zaključili da im je baš to trebalo.

Potom je uslijedilo predavanje o kulturno povijesnim zanimljivostima grada Bobovca, njegovoj povijesti te važnosti.

Nakon toga smo se uputili na ručak prema izletištu Luke gdje su nas dočekali predstavnici udruge Čuvari bosanske krune na čelu sa gospodinom Šabanom Ibrišimovićem. Za nas su priredili ukusne peke, juhu, tri razne vrste pita, kolače, domaće sokove, slatka, sve pripremljeno isključivo na domaći način.

Nakon jela je bilo upriličeno natjecanje u srednjovjekovnim igrama poput gađanja lukom i strijelom, potezanje konopa, bacanje kamena sa ramena, ali zbog manjka vremena, zime i smrkavanja odlučili smo se za povratak.

Gosti su prilikom odlaska pokupovali domaće sokove i džemove, te smo se zaputili prema Sarajevu.

Sa gostima smo se oprostili u Podlugovima, uz obećanje da dolaze opet.

Naknadno im je uručen video cd sa slikama koji je sniman tijekom cijelog njihovog izleta, njegova izrada je bila uračunata u cijenu izleta, te su se posebno obradovali tome kad su ga primili u Sarajevu.

U protekloj godini uloženo je puno ljubavi, entuzijazma, truda u radu na afirmaciji i prezentiranju turističkih potencijala općine Vareš.

Projekti tragovima bosanskog



kraljevstva, postavljanje urbane turističke signalizacije, registracija seoskih domaćinstava koja se žele baviti seoskim turizmom, registracija i početak rada kluba ekstremnih sportova Perun Valium, predstavljanje

turističkih potencijala predstavnicima najvećih turističkih agencija iz regiona, samo su dio aktivnosti čije pozitivne rezultate kroz organizovan dolazak turističkih grupa očekujemo već u narednoj godini.



**Turisti na Bobovcu**

## POMOĆ ZA ODRŽIVI POVRATAK

U cilju planiranja kvalitetne izrade i transparentne provedbe planova pomoći održivog povratka na teritoriji BiH CRS je u saradnji sa Vladom kraljevine Holandije, Federalnim ministarstvom raseljenih osoba i izbjeglica, Ministarstvom za raseljene osobe i izbjeglice RS, Ministarstvom socijalne politike raseljenih osoba kantona Sarajevo i Ministarstvom za socijalnu politiku i izbjeglice ZE-DO kantona, implementirao Projekat "TRAJNA RJEŠENJA ZA KORISNIKE KOLEKTIVNIH CENTARA U BIH, POMOĆ ZA ODRŽIVI

POVRATAK".

Na projekat su mogli da apliciraju svi povratnici koji do sada nisu dobili nikakvu pomoć za održivi povratak

Na području naše općine je apliciralo stotinu korisnika, a odabrano je dvadeset korisnika.

Odabrani korisnici će proći kroz edukaciju CRS-a s ciljem obučavanja istih u pravilnoj izradi (pisanju) bisznis planova za porodična poljoprivredna gazdinstva.

Vrijednost projekta po korisniku će biti od 2.500-4.000 KM ovisno o vrsti pomoći koju je tražio.

## Prvi snijeg u Varešu

U prvoj polovini oktobra, (12.10 i 13.10. 2009.) na području općine Vareš usljed sniježnih padavina došlo je do prekida električnih vodova kao i otežanog prometa vozila a velika šteta nenešena je voćnjacima na području općine. Usljed težine snijega, došlo je do pucanja i lomljenja drveća što je ekipama iz elektrodistribucije i profesionalnog vatrogasnog voda Vareš značajno otežavalo posao na normalizaciji saobraćaja i redovnom snabdjevanju električnom energijom. Velika oštećenja pretrpjelo je i drveće u gradskom području.

U raščišćavanju polomljenog drveća, po gradskim ulicama i parkovima učestvovala je Civilna zaštita, odnosno Vatrogasna jedinica.

U noći između 26 i 27. novembra 2009. godine, na području MZ Borovica pojavio se šumski požar, koji je zahvatio veću površinu niskog rastinja. U gašenju požara je učestvovala Profesionalna vatrogasna jedinica od 23 h do 04 h, te je isti uspješno lokaliziran i ugašen.

Takođe, dana 24.10. 2009. godine, Mašinski tim Federalne uprave civilne zaštite izvršio je uklanjanje ruševina objekata Tenšek Zdenka, na platou autobuske stanice u Vareš Majdanu.



**Uklanjanje polomljenog drveća**



Na osnovu čl. 6., 14. i 49. Zakona o komunalnim djelatnostima („Službene novine

ZE-DO kantona, br. 17/08) i člana 22. Statuta Općine Vareš, broj: 01-25/09 od 29.01.2009. godine, Općinsko vijeće Vareš, na 12 sjednici održanoj dana 12.11. 2009. godine, d o n o s i

## O D L U K U

o izmjenama i dopunama Odluke o vodovodu i kanalizaciji

### Član 1.

U Odluci o vodovodu i kanalizaciji, broj: 01-160/02 od 17.10.2002. godine i broj 01-65/07 od 29.03.2007. godine, iza člana 2. dodaje se novi član 2. a. koji glasi:

#### “Član 2. a.

Općina Vareš i Javno komunalno preduzeće d.o.o. Vareš, obavezni su:

-osigurati trajno obavljanje komunalnih djelatnosti koje odgovaraju kvalitetom i standardom utvrđenoj visini cijene koju korisnici usluga plaćaju za njihovo izvršenje;

-osigurati održavanje komunalnih objekata i uređaja koji su u nadležnosti JKP d.o.o. Vareš, u stanju funkcionalne sposobnosti;

-poduzimati mjere za očuvanje i zaštitu okoliša;

-osigurati javnost i transparentnost rada“.

### Član 2.

Član 18. mijenja se i glasi:

#### “Član 18.

Vlasnik građevine dužan je priključiti svoju građevinu na komunalnu infrastrukturu pod uslovima utvrđenim propisima koji regulišu oblast prostornog uređenja i građenja, kao i drugim propisima, odnosno prema odlukama općine koja pobliže definišu

tu komunalnu djelatnost (pod uslovom da postoji kapacitet određenog komunalnog proizvoda i usluge za priključenje novih korisnika koji neće ugroziti postojeće korisnike).

Vlasnik ili korisnik građevine obavezan je JKP d.o.o. Vareš, podnijeti pismeni zahtjev za priključenje na gradsku vodovodnu i kanizacionu mrežu sa priložima o dokazu vlasništva ili prava korištenja kao što su izvodi iz zemljišnih knjiga, rješenja o odobrenju gradnje, kupoprodajni ugovori ili ugovori o zakupu i slično“.

### Član 3.

Član 19. mijenja se i glasi

#### “Član 19.

Vlasnik građevine plaća troškove priključenja na komunalnu infrastrukturu JKP d.o.o. Vareš koji izvodi priključenje građevine.

U troškove iz stava 1. ovog člana uključena je cijena mjernog instrumenta potrošnje, odnosno vrijednost centralnog, odnosno glavnog mjernog instrumenta za objekte kolektivnog stanovanja, koji se unosi u stalna sredstva JKP d.o.o. Vareš“.

### Član 4.

Član 22. mijenja se i glasi:

#### “Član 22.

Pojedinačni mjerni instrument potrošnje vode za stambenu jedinicu u okviru stambenog objekta kolektivnog stanovanja spada u opremu stambene jedinice, a njegovu prvu nabavku, ugradnju, troškove eksploatacije i funkcionisanje snosi vlasnik stambene jedinice i unosi se u stalna sredstva JKP d.o.o. Vareš.

Vlasnik stambene jedinice iz stava 1. ovog člana, prilikom nabavke, ugradnje, eksploatacije i funkcionisanja mjernog instrumenta potrošnje dužan je da se pridržava projekta, tehničkih normativa i standarda i uputstva davaoca komunalne usluge.

Vlasnik stambene jedinice, u okviru stambenog objekta, održavanje mjernog instrumenta potrošnje iz stava 1. ovog člana povjerava JKP d.o.o. Vareš.

Prilikom izgradnje novih objekata kolektivnog stanovanja dužnost investitora je da za svaku stambenu ili poslovnu jedinicu obezbijedi odvojen priključak na komunalnu mrežu. U protivnom JKP d.o.o. Vareš nije dužan izvršiti priključak novog objekta kolektivnog stanovanja. Prilikom izgradnje priključak i mjerilo ulazi u cijenu stambene ili poslovne jedinice“.

### Član 5.

Iza člana 22. dodaje se novi član 22. a., koji glasi:

#### “Član 22. a.

Vlasnici stambenih jedinica dužni su održavati i dovesti u funkcionalno stanje, lično ili putem ovlaštenih upravitelja svoje kućne instalacije kao i instalacije koje spadaju u zajedničke dijelove ili uređaje zgrade.

JKP d.o.o. Vareš ne snosi odgovornost za prekid u pružanju komunalnih usluga ili za štete do kojih dolazi zbog neispravnosti kućnih instalacija ili uređaja, čije održavanje i dovođenje u funkcionalno stanje je unadležnosti vlasnika stambenih jedinica ili njihovih ovlaštenih upravitelja.

Vlasnici stambenih jedinica mogu osim ovlaštenim upraviteljima održavanje kućnih instalacija povjeriti i JKP d.o.o. Vareš uz odgovarajuću naknadu.

Zabranjene su neovlaštenim licima bilo kakve intervencije na komunalnoj infrastrukturi i postrojenjima“.

### Član 6.

Iza člana 25. naslov “2. Isključenje korisnika s javnog vodovoda“ zamjenjuje se tekstem:

“2. Uskraćivanje komunalne usluge“.

**Član 7.**

Član 26. mijenja se i glasi:

**“Član 26.**

**(1)** Komunalna usluga ne može se uskratiti korisniku osim ako:

a) izvrši priključenje na komunalnu mrežu bez predhodno pribavljenog odobrenja nadležnog organa ili JKP d.o.o. Vareš;

b) otpočne sa korištenjem komunalne usluge bez predhodne prijave i davanja potrebnih podataka za evidentiranje obveznika plaćanja kod JKP d.o.o. Vareš;

c) koristi uslugu protivno propisima ili ugovoru;

d) ne plati iskorištenu komunalnu uslugu tri mjeseca uzastopno ili odbija da primi račun ili vrati račun za izvršenu komunalnu uslugu bez opravdanog razloga;

e) neosonovano ometa druge korisnike usluga;

f) nenamjenski koristi komunalnu uslugu u vrijeme otežanog snabdijevanja, odnosno snabdijevanja uz ograničenje potrošnje (redukciju) o čemu je korisnik blagovremeno obavješten na odgovarajući način;

g) bez odobrenja JKP d.o.o. Vareš izvrši prepravku ili dogradnju na instalacijama komunalne infrastrukture;

h) je prostor za smještaj mjernog instrumenta potrošnje krivicom ili iz nehata potrošača zagrađen, zaključan ili nepristupačan;

i) potrošač ima potrošnju vode preko 250 l/dan po članu domaćinstva i time ugrožava snabdijevanje drugih potrošača;

j) potrošač priključi nove mjerne instrumente potrošnje i kanalizacione instalacije ili izvrši rekonstrukciju postojećih, ili ako dozvoli da se na njihov priključak priključi drugi objekat, a za ove radove i postupke nema pisмено odobrenje JKP d.o.o. Vareš;

k) potrošač namjerno pokvari mjerni instrument potrošnje;

l) potrošač bez odobrenja JKP d.o.o. Vareš izvrši izmještanje kućnog priključka ili mjernog instrumenta potrošnje ili skidanje mjernog instrumenta potrošnje;

m) potrošač svoju kućnu instalaciju priključi na kućne instalacije drugog korisnika bez odobrenja JKP d.o.o. Vareš;

n) potrošač instalacije posebnih (lokalnih) vodovoda spoji sa instalacijama preko kojih se snabdijeva vodom iz gradskog vodovoda;

o) onemoguću službenom licu pristup za očitavanje mjernog instrumenta potrošnje i nakon pismene opomene;

p) onemoguću ulazak radi pregleda zajedničkih i unutrašnjih instalacija ovlaštenom predstavniku JKP d.o.o. Vareš, odnosno nadležnom inspektor, u zgradama gdje je zajedničko mjerilo ili gdje mjerilo ne postoji;

r) potrošač koji je bio isključen sa komunalne mreže sam se ponovo priključi na komunalnu mrežu.

**(2)** Komunalne usluge iz stava (1) ovog člana uskratit će se korisniku pod uslovom da to tehničke mogućnosti dozvoljavaju i da se isključenjem ne ugrožavaju drugi korisnici komunalnih usluga.

**(3)** Po prestanku razloga za uskraćenje komunalne usluge, JKP d.o.o. Vareš je dužno da, na zahtjev korisnika komunalne usluge, najkasnije u roku od tri dana od dana podnošenja zahtjeva i plaćenih stvarnih troškova za ponovno uključenje, nastave pružanje komunalne usluge korisniku.

**(4)** Korisnik ne može otkazati korištenje komunalne usluge ako to tehničke mogućnosti ne dozvoljavaju, odnosno ako bi se time ugrozio kvalitet korištenja i standard drugih korisnika, te ako bi se time negativno uticalo na okoliš“.

**Član 8.**

Član 67. mijenja se i glasi:

**“Član 67.**

**(1)** Visinu cijene i način plaćanja komunalne usluge predlaže JKP d.o.o. Vareš, na temelju detaljne kalkulacije, a u skladu sa odredbama čl. 10., 11. i 12. Zakona o komunalnim djelatnostima, kojom se obezbjeđuje najmanje prosta reprodukcija u periodu od dvije godine..

**(2)** Cijena komunalne usluge sadrži sve troškove tekućeg održavanja i funkcionisanja komunalnog sistema, te troškove nabavke novih stalnih sredstava JKP d.o.o. Vareš i anuitete kreditnih zaduženja za strateške projekte prema članu 34. stav 2. i 3. Zakona o komunalnim djelatnostima.

**(3)** Odnos cijena komunalnih proizvoda i usluga individualne komunalne potrošnje za potrošače domaćinstva u stambenim objektima i stanovima i potrošače pravna lica subjekte u poslovnim objektima i prostorima određuje svojim propisom Općinsko vijeće.

**(4)** U cijenu komunalne usluge uključena je amortizacija koja se sastoji iz amortizacije stalnih sredstava koja JKP d.o.o. Vareš služe kao sredstvo za rad i amortizacije stalnih sredstava infrastrukturnog komunalnog sistema, koja po svom karakteru moraju biti ili već jesu javna dobra u općoj upotrebi.

**(5)** JKP d.o.o. Vareš sredstva izdvojena po osnovu amortizacije koristi za obnavljanje stalnih sredstava rada po programu preduzeća, a dio amortizacije stalnih sredstava infrastrukturnog komunalnog sistema, odnosno dobara u općoj upotrebi koristi prema programu na koji saglasnost daje vlasnik tih sredstava u općoj upotrebi.

**(6)** Validnost kalkulacije i utvrđivanje cijena komunalnih usluga vrši se u skladu sa Statutom JKP d.o.o. Vareš.



(7) Cijena komunalne usluge za pruženu komunalnu uslugu plaća se JKP d.o.o. Vareš.

(8) Ukoliko organ iz stava (3) ovog člana utvrdi nižu cijenu usluge od ekonomske cijene korištenja ili je ne usaglašava sa rastom cijena, onda je isti organ davocu komunalne usluge obavezan naknaditi razliku sredstava“.

## Član 9.

Iza člana 67. dodaje se novi član 67. a., koji glasi:

### “Član 67. a.

Korisnik komunalne usluge dužan je platiti utvrđenu cijenu za pruženu komunalnu uslugu, u ugovorenom – propisanom roku, kao i izvršiti prijavu i odjavu svih promjena (promjena adrese, broja članova domaćinstva, površina objekta i slično), u roku od 8 dana od dana nastale promjene.

O sporovima između korisnika i davaoca komunalne usluge odlučuje nadležni sud“.

## Član 10.

U članu 68. dodaje se stav 1. koji glasi:

“JKP d.o.o. Vareš će mjesečno vršiti ažuriranje evidencija bitnih za obračun utroška vode i naknade za kanalizaciju i ispostavljati akontativne račune, dok će se očitavanje vodomjera vršiti najmanje jednom tromjesečno. Prilikom ispostavljanja računa za mjesec za koji je izvršeno očitavanje vodomjera, JKP d.o.o. Vareš dužno je sravniti potrošnju i zaduženje svakog potrošača po predhodno ispostavljenim akontativnim računima“.

Dosadašnji stavovi 1., 2. i 3. postaju stavovi 2., 3. i 4.

## Član 11.

Član 70. mijenja se i glasi:

“Evidencija o broju korisnika usluga za svaku stambenu jedinicu utvrđuje se

putem kućnih savjeta i savjeta Mjesnih zajednica, odnosno utvrđivanjem stanja od strane ovlaštenih lica JKP d.o.o. Vareš.

Svaku promjenu u domaćinstvu potrošač je dužan u pismenoj formi prijaviti JKP d.o.o. Vareš.

U slučaju da potrošač odbije ili propusti prijaviti promjenu iz predhodnog stava to će uz pismenu evidenciju učiniti ovlaštena lica JKP d.o.o. Vareš“.

## Član 12.

U članu 77. na kraju teksta dodaje se novi stav koji glasi:

“Ukoliko potrošač odbije ili propusti podnijeti pismenu odjavu, prijaviti promjenu vlasnika objekta, odnosno potrošača, kao i druge promjene bitne za obračun utroška vode i naknade za kanalizaciju, to će uz pismenu evidenciju učiniti ovlaštene osobe JKP d.o.o. Vareš“.

## Član 13.

Član 85. mijenja se i glasi:

### “Član 85.

JKP d.o.o. Vareš dužno je putem oglasa, lokalnog medija ili na drugi pogodan način obavjestiti korisnike komunalnih usluga o planiranim ili očekivanim smetnjama i prekidi- ma koji će nastati ili mogu nastati u pružanju komunalnih usluga najkasnije jedan dan prije očekivanog prekida u pružanju tih usluga“.

## Član 14.

Član 86. mijenja se i glasi:

### “Član 86.

(1) U slučaju nastupanja neplaniranih i neočekivanih poremećaja ili prekida u pružanju komunalnih usluga, odnosno obavljanju komunalnih djelatnosti, JKP d.o.o. Vareš dužno je odmah o tome na adekvatan način obavjestiti nadležni organ za komunalne poslove Općine

Vareš i istovremeno poduzeti mjere za otklanjanje uzroka poremećaja ili prekida.

(2) Nadležni organ za komunalne poslove Općine Vareš po prijemu obavještenja iz stava (1) ovog člana, odnosno po utvrđivanju poremećaja ili prekida u pružanju komunalnih usluga dužan je odmah da:

a) odredi red prvenstva i način pružanja usluga onim korisnicima kod kojih bi usljed prekida nastala opasnost po život i rad građana ili rad pravnih i fizičkih lica ili bi nastala značajna odnosno nenadoknadiva šteta;

b) naredi mjere za hitnu zaštitu komunalnih objekata i druge imovine koja je ugrožena;

c) poduzme mjere za otklanjanje nastalih posljedica i druge potrebne mjere za obavljanje komunalnih djelatnosti;

d) utvrdi razloge i eventualnu odgovornost za poremećaj, odnosno prekid vršenja djelatnosti i učinjenu štetu.

(3) ukoliko je prekid u pružanju komunalnih usluga nastao kao posljedica neodgovornog i nesavjesnog rada JKP d.o.o. Vareš, isto je dužno namiriti eventualno izazvanu štetu kod korisnika komunalnih usluga“.

## Član 15.

Član 87. mijenja se i glasi:

### “Član 87.

Sredstva za obavljanje komunalne djelatnosti, iz oblasti vodovoda i kanalizacije, obezbjeđuju se iz:

- prihoda ostvarenih od komunalnih usluga iz segmenta individualne komunalne potrošnje, iz oblasti vodovoda i kanalizacije;

- drugih izvora po posebnim propisima“.

## Član 16.

Iza člana 87. dodaje se član 87.a. koji glasi:

**“Član 87. a.**

(1) Iz prihoda ostvarenih od komunalnih usluga iz segmenta individualne komunalne potrošnje, iz oblasti vodovoda i kanalizacije, obezbjeđuju se sredstva za obavljanje sljedećih komunalnih djelatnosti:

- a) snabdijevanje pitkom vodom i
- b) odvođenje i prečišćavanje otpadnih voda“;

**Član 17.**

Ova odluka stupa na snagu osmog dana od dana objavljivanja na oglasnoj tabli Općinskog vijeća Vareš.

## **Obrazloženje Odluke o izmjenama i dopunama Odluke o vodovodu i kanalizaciji**

Pravni osnov za donošenje Odluke o izmjenama i dopunama Odluke o vodovodu i kanalizaciji je sadržan u članovima 6., 14. i 49. Zakona o komunalnim djelatnostima („Službene novine ZE-DO kantona, broj: 17/08)

Članom 6. je navedeno da Općina

obezbjeđuje obavljanje komunalnih djelatnosti određenih ovim zakonom.

Članom 14. je navedeno da prava i obaveze između davaoca i korisnika komunalnih usluga regulisati će se općinskim odlukama kojima će se urediti djelatnosti koje se odnose na komunalna preduzeća i

Članom 49. je navedeno da će Općinska vijeća najkasnije u roku od jedne godine od dana stupanja na snagu ovoga zakona donijeti podzakonske propise propisane ovim zakonom.

Razlozi za donošenje Odluke:

Ova Odluka se razlikuje u odnosu na dosadašnju Odluku što su u nju uvrštene odredbe Zakona o komunalnim djelatnostima („Službene novine ZE-DO kantona, broj: 17/08“) a odnose se na sasvim drugačiji način regulisanja cijena komunalnih usluga kao i neka druga pitanja nego što je to bilo regulisano Zakona o komunalnim djelatnostima („Službeni list SRBiH“, broj: 20/09), čija je primjena prestala danom stupanja na snagu ovoga Zakona

U članu 67. Odluke o vodovodu i kanalizaciji, koji se mijenja ovom

Odlukom, definisano je da za utrošenu vodu iz vodovodne mreže i za korištenje kanalizacijske mreže, potrošač plaća naknadu po cijenama koje utvrdi Nadzorni odbor JKP d.o.o. Vareš, a na osnovu prethodne saglasnosti općinskog načelnika. Ovo nije u skladu sa kantonalnim Zakonom o komunalnim djelatnostima te se ovom Odlukom mijenja član 67., članom 8. i usklađuje sa odredbama Zakona koji definiše način određivanja cijene komunalnih usluga.

Ovo je osnovni razlog donošenja ove Odluke dok su ostale izmjene i dopune (članovi 1., 2., 3., 4., 5., 6., 7., 13., 15. i 16) takođe preuzeti iz Zakona, a u cilju otklanjanja nejasnoća do kojih je dolazilo u dosadašnjoj primjeni Odluke o vodovodu i kanalizaciji izvršeno je poboljšanje ove Odluke članovima 10., 11. i 12.

Predložena Odluka je usaglašena sa Zakona o komunalnim djelatnostima Zeničko-dobojskog kantona, te se predlaže Općinskom vijeću da usvoji ovu Odluku.

**PREDLAGAČ  
OPĆINSKI NAČELNIK  
Hamdo Fatić**